

s.a.w. bersembahyang dan aku pula berbaring di antaranya dan qiblatnya. Apabila hendak bersujud, Baginda menyentuh kedua kakiku lalu aku pun melipatkan kedua-duanya.”⁸⁵³

باب المرأة تطرح عن المصلي شيئا من الأذى

82- Bab Perempuan Membuang Sesuatu Kotoran Dari Orang Yang Sedang Bersembahyang.⁸⁵⁴

490- حَدَّثَنَا أَحْمَدُ بْنُ إِسْحَاقَ السُّورَمَارِيُّ قَالَ حَدَّثَنَا عُبَيْدُ اللَّهِ بْنُ مُوسَى قَالَ حَدَّثَنَا إِسْرَائِيلُ عَنْ أَبِي إِسْحَاقَ عَنْ عَمْرِو بْنِ مَيْمُونٍ عَنْ عَبْدِ اللَّهِ قَالَ بَيْنَمَا رَسُولُ اللَّهِ صَلَّى اللَّهُ عَلَيْهِ وَسَلَّمَ قَائِمٌ يُصَلِّي عِنْدَ الْكَعْبَةِ وَجَمَعَ قُرَيْشٍ فِي مَجَالِسِهِمْ إِذْ قَالَ قَائِلٌ مِنْهُمْ أَلَا تَنْظُرُونَ إِلَى هَذَا الْمُرَاتِي أَيُّكُمْ يَقُومُ إِلَى جَزُورِ آلِ فُلَانٍ فَيَعْبُدُ إِلَى فَرْنِهَا وَدَمِهَا وَسَلَاهَا فَيَجِيءُ بِهِ ثُمَّ يُمَهِّلُهُ حَتَّى إِذَا سَجَدَ وَضَعَهُ بَيْنَ كَتِفَيْهِ فَانْبَعَثَ أَشْقَاهُمْ فَلَمَّا سَجَدَ رَسُولُ اللَّهِ صَلَّى اللَّهُ عَلَيْهِ وَسَلَّمَ وَضَعَهُ بَيْنَ كَتِفَيْهِ وَتَبَتِ النَّبِيُّ صَلَّى اللَّهُ عَلَيْهِ وَسَلَّمَ سَاجِدًا فَضَحِكُوا حَتَّى مَالَ بَعْضُهُمْ إِلَى بَعْضٍ مِنَ الضَّحِكِ فَانْطَلَقَ مُنْطَلِقًا إِلَى فَاطِمَةَ عَلَيْهَا السَّلَامُ وَهِيَ جُوَيْرِيَّةٌ فَأَقْبَلَتْ تَسْعَى وَتَبَتِ النَّبِيُّ صَلَّى اللَّهُ عَلَيْهِ وَسَلَّمَ سَاجِدًا حَتَّى أَلْقَتْهُ عَنْهُ وَأَقْبَلَتْ عَلَيْهِمْ تَسْبِيحًا فَلَمَّا قَضَى رَسُولُ اللَّهِ صَلَّى اللَّهُ عَلَيْهِ وَسَلَّمَ الصَّلَاةَ قَالَ اللَّهُمَّ عَلَيْكَ بِقُرَيْشٍ اللَّهُمَّ عَلَيْكَ بِقُرَيْشٍ اللَّهُمَّ عَلَيْكَ بِقُرَيْشٍ ثُمَّ سَمَى اللَّهُمَّ عَلَيْكَ بِعَمْرِو بْنِ هِشَامٍ وَعُتْبَةَ بْنِ رَبِيعَةَ وَشَيْبَةَ بْنِ رَبِيعَةَ وَالْوَلِيدَ بْنَ عُتْبَةَ وَأُمَيَّةَ بْنَ خَلْفٍ وَعُقْبَةَ بْنَ أَبِي مُعَيْطٍ وَعُمَارَةَ بْنَ الْوَلِيدِ قَالَ عَبْدُ اللَّهِ فَوَاللَّهِ لَقَدْ رَأَيْتُهُمْ صَرَخُوا يَوْمَ بَدْرٍ ثُمَّ سَجُّوا إِلَى الْقَلِيبِ قَلِيبٍ بَدْرٍ ثُمَّ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ وَأُتِيعَ أَصْحَابُ الْقَلِيبِ لَعْنَةً

490- Ahmad bin Ishaq al-Suramari meriwayatkan kepada kami, katanya: Ubaidullah bin Musa (bin Baazaam) meriwayatkan kepada kami, katanya: Isra'il (bin Yunus bin Abi Ishaq as-Sabi'i) meriwayatkan kepada kami daripada Abi Ishaq ('Amar bin 'Abdillah) daripada 'Amar bin Maimun daripada 'Abdillah (bin Mas'ud), katanya: “Ketika Rasulullah s.a.w. sedang bersembahyang dekat Ka'bah, ada sekumpulan orang-orang

⁸⁵³ Hadits 'Aaisyah ini sebenarnya telah pun berlalu di bawah باب التطوع خلف المرأة dan باب الصلاة . Untuk mendapat pengajaran, panduan dan hukum daripadanya sila lihat hadits no:483 dan nota no:843 di bawahnya. Lihat juga hadits no:369 dan nota:473 di bawahnya.

⁸⁵⁴ Kata Ibnu Batthaal: “Tajuk bab ini hampir sama maksudnya dengan tajuk-tajuk bab sebelumnya. Seseorang perempuan apabila berusaha menghilangkan kotoran yang diletakkan di atas belakang seseorang yang sedang bersembahyang, sudah pasti dia tidak akan mengambilnya dan membuangnya dari arah belakang sahaja. Dia bahkan akan mengambilnya dan membuangnya dari semua arah yang termudah kepadanya. Keadaan itu jika tidak lebih teruk daripada melintas di hadapan orang yang sedang bersembahyang, tidak juga ia kurang atau lebih ringan daripadanya.”

Quraisy berhimpun dalam majlis mereka. Tiba-tiba ada yang berkata di antara mereka: "Tengoklah kepada org yang menunjuk-nunjuk (sembahyangnya kepada kita) ini. Siapakah yang boleh pergi kepada unta keluarga fulan yang baru disembelih untuk mengambil tahi, darah dan tembuninya? Kemudian ditunggunya dia bersujud untuk meletakkan semua benda-benda tadi di antara dua belikatnya? Maka pergilah seorang lelaki yang paling celaka ('Uqbah bin Abi Mu'aith) di kalangan mereka. Apabila Rasulullah s.a.w. sujud, dia pun meletakkannya di atas dua belikat baginda s.a.w. Nabi s.a.w. terus bersujud. Mererka ketawa sehingga sebahagian mereka condong kepada sebahagian yang lain kerana kuat sangat ketawanya. Ada orang pergi bertemu Fathimah. Ketika itu Fathimah masih kecil lagi. Dia pun datang sambil berlari. Nabi s.a.w. ketika itu masih lagi bersujud sehinggalah Fathimah membuang barang-barang kotor tadi dari Baginda s.a.w. sambil beliau menyumpah mereka. Setelah selesai bersembahyang Rasulullah s.a.w. berdoa: "Ya Allah, hukumlah (binasakanlah) orang-orang Quraisy ini. Ya Allah, hukumlah (binasakanlah) orang-orang Quraisy ini. Ya Allah, hukumlah (binasakanlah) orang-orang Quraisy ini. Kemudian Nabi s.a.w. menyebut nama-nama mereka: "Ya Allah, hukumlah (binasakanlah) 'Amar bin Hisyam (Abu Jahal), 'Utbah bin Rabi'ah, Syaibah bin Rabi'ah, al-Walid bin 'Utbah, Umaiyah bin Khalaf, 'Uqbah bin Abi Mu'aith dan 'Umarah bin al-Walid." 'Abdullah (Ibnu Mas'ud) berkata: "Demi Allah, aku nampak mereka ini bergelimpangan pada hari Badar (kecuali 'Umarah bin al-Walid)."⁸⁵⁵ Kemudian mereka diseret ke sebuah telaga buruk di medan Badar itu. Selepas itu Rasulullah s.a.w. berkata: "Orang-orang yang dibuang ke dalam telaga itu dicurahi laknat Allah."⁸⁵⁶

⁸⁵⁵ Maksud beliau ialah kebanyakan mereka, bukan kesemua mereka. Abu jahal dibunuh oleh 'Amar bin Al-Jamuh dan Mu'az bin 'Afraa'. 'Utbah bin Rabi'ah dibunuh oleh Hamzah atau 'Ali. Syaibah bin Rabi'ah juga dibunuh oleh Hamzah. Walid bin 'Utbah dibunuh oleh 'Ubaidah bin Al-Hariths atau 'Ali atau Hamzah atau mereka semua telah sama-sama membunuhnya. Umaiyah bin Khalaf dibunuh oleh Mu'az bin 'Afraa', Kharijah bin Zaid dan Khubaib bin Isaf. 'Uqbah bin Abi Mu'aith mengikut sesetengah 'ulama', telah dibunuh oleh 'Ali atau 'Ashim bin Tsabit tetapi yang betulnya ialah ia telah dibunuh oleh Nabi s.a.w sendiri. Adapun 'Umarah bin Al-Walid, dia telah menjadi gila di Habsyah dan terus berkeliaran seperti binatang kerana disihir oleh orang-orang di sana setelah dia mengganggu isteri Najasyi. Demikianlah keadaannya sehingga mati di zaman Saiyyidina 'Umar.

⁸⁵⁶ Apa yang disebutkan di dalam hadits ini adalah sebahagian daripada perbuatan jahat orang-orang kafir Quraisy terhadap Rasulullah s.a.w. di permulaan Islam. Doa Rasulullah s.a.w.

dimaqbulkan Allah. Kerana mereka yang terlibat dalam peristiwa ini kebanyakannya terbunuh dalam peperangan Badar dalam keadaan penuh kehinaan dan mereka dicurahi pula dengan la'nat daripada Allah. **Antara pengajaran dan panduan** yang dapat diambil dari hadits ini ialah: (1) Dugaan yang dihadapi Nabi s.a.w. di peringkat permulaan da'wahnya amat dahsyat. (2) Doa Rasulullah s.a.w. terhadap orang-orang yang telah berbuat jahat kepadanya dalam peristiwa ini diterima Allah. (3) Orang-orang yang didoakan keburukan oleh Nabi s.a.w. itu adalah orang-orang yang memang malang. Sudah tidak ada lagi harapan sebenarnya untuk mereka menerima kebenaran Islam. Merekalah orang-orang yang dimaksudkan oleh Allah menerusi firmanNya ini:

إِنَّا كَفَيْنَاكَ الْمُسْتَهْزِئِينَ ﴿٩٥﴾

Bermaksud: Sesungguhnya Kami tetap memelihara dan mengawalmu dari kejahatan orang-orang yang mengejek-ejek dan mempersendakanmu. (al-Hijr: 95). (4) Nabi s.a.w. tidak akan segera mendoakan keburukan terhadap orang-orang yang masih ada harapan akan meneriama Islam dan bertaubat. Untuk mereka ini baginda s.a.w. biasanya mendoakan agar mereka diberikan hidayat dan taufiq oleh Allah. (5) Keharusan mendoakan keburukan untuk orang-orang kafir yang teruk sangat menyakiti dan menzalimi umat Islam. Untuk mendapat pengajaran dan panduan selebihnya dari hadits ini sila lihat hadits no:233 di bawah جيفة أو جيفة قنر أو جيفة dan nota no:131 hingga no:137. Menurut Syeikh Zakariya, Bara'ah ikhtitaam bagi Abwaab Sutra terletak pada kata-kata Ibnu Mas'ud بَدْرَ صَرَعَى يَوْمَ بَدْرَ (aku nampak mereka ini bergelimpangan pada hari Badar). Kata-kata ini jelas menunjukkan kesudahan hidup mereka. Bagi penulis, Bara'ah ikhtitaam boleh juga difahami daripada kata-kata mereka: أَيُّكُمْ يَقُومُ إِلَى جَزُورٍ (Siapakah yang boleh pergi kepada unta keluarga fulan yang baru disembelih untuk mengambil tahi, darah dan tembuninya?). Doa Rasulullah s.a.w. اللَّهُمَّ عَلَيْكَ بَعْمَرُ بْنُ رَبِيعَةَ وَشَيْبَةُ بْنُ رَبِيعَةَ وَالْوَلِيدُ بْنُ عُبَيْدٍ وَأُمَيَّةُ بْنُ خَلْفٍ وَعُقْبَةُ بْنُ أَبِي مُعَيْطٍ وَعُمَارَةُ بْنُ الْوَلِيدِ (Ya Allah, hukumlah (binasakanlah) `Amar bin Hisyam (Abu Jahal), `Utbah bin Rabi'ah, Syaibah bin Rabi'ah, al-Walid bin `Utbah, Umaiyah bin Khalaf, `Uqbah bin Abi Mu'aith dan `Umarah bin al-Walid) juga boleh dianggap sebagai Bara'ah ikhtitaam Abwaab Sutra ini, dari segi ia mengisyaratkan kepada kematian mereka yang akan menjelang tidak lama lagi selepas mendapat doa itu.

بِسْمِ اللَّهِ الرَّحْمَنِ الرَّحِيمِ

كِتَابُ مَوَاقِيتِ الصَّلَاةِ

KITAB WAKTU-WAKTU SEMBAHYANG.⁸⁵⁷

⁸⁵⁷ Perbezaan di antara tajuk besar ini dengan tajuk kecil berikutnya ialah tajuk besar ini bermaksud menyatakan waktu-waktu sembahyang secara mutlaq, sama ada ia waktu utama untuk mengerjakan sembahyang atau waktu makruh dan sebagainya. Tajuk bab kecil di bawahnya pula selain bermaksud menyatakan waktu-waktu sembahyang, ia juga diadakan dengan maksud menyatakan waktu sembahyang yang afdhal dan kelebihan sembahyang itu sendiri. Demikianlah tajuk bab besar dan bab kecil yang terdapat di dalam kebanyakan nuskah Sahih Bukhari. Tetapi di dalam salah satu nuskah Sahih Bukhari seperti yang tercatat di hasyiah (di tepi) Sahih Bukhari cetakan India dan Pakistan, keadaannya terbalik, di mana tajuk bab besarnya ialah كِتَابُ مَوَاقِيتِ الصَّلَاةِ dan tajuk bab kecilnya pula ialah بَابُ مَوَاقِيتِ الصَّلَاةِ tanpa ada فَضْلُهَا selepasnya. Syeikh Zakariya r.a. di dalam Al-Abwaab Wa At-Taraajim dan juga Taqrir Sahih Bukharinya mentarjihkan nuskah terakhir ini, kerana Kitab Mawaaqit as-Shalah secara keseluruhannya mengandungi bab-bab yang menyatakan waktu-waktu sembahyang dan kelebihanannya. Kelebihan sembahyang atau waktu-waktunya tidak hanya terdapat di bawah bab pertama sahaja. Penulis bersetuju sangat dengan pendapat Syeikh Zakariya itu, justeru pendapat beliau menepati sekian banyak bab di bawah Kitab Waktu-Waktu Sembahyang yang diadakan oleh Bukhari. Jika dipakai nuskah kebanyakan Sahih Bukhari, dhamir (ganti nama) pada perkataan فَضْلُهَا di dalam بَابُ مَوَاقِيتِ الصَّلَاةِ boleh dikembalikan sama ada kepada perkataan الصَّلَاةِ atau perkataan مَوَاقِيتِ yang terletak sebelumnya. Dalam keadaan ganti nama itu dikembalikan kepada perkataan مَوَاقِيتِ, kelebihan waktu-waktu sembahyanglah yang akan difahami. Ia difahami dan disimpulkan daripada kedatangan Jibril secara khusus untuk menerangkan waktu-waktunya. Dalam keadaan ganti nama itu dikembalikan kepada perkataan الصَّلَاةِ pula, kelebihan sembahyang akan difahami daripada kedatangan Jibril itu juga. Kalau ia menunjukkan kepada kelebihan waktu-waktu sembahyang, tentulah sembahyang itu sendiri adalah sesuatu yang memang istimewa dan mempunyai kelebihan. **Boleh dikatakan di sebalik** setiap hukum yang Allah tentukan kepada hamba-hambaNya, pasti ada banyak hikmat dan rahsia yang tersirat. Begitulah juga dengan waktu-waktu yang ditentukan oleh Allah untuk sembahyang yang lima. Tidak semestinya manusia mengetahui segala hikmat dan rahsia di sebalik setiap hukum. Namun sedikit sebanyak hikmatnya jika tersingkap, niscaya akan memberikan semacam ketenangan dan kepuasan kepada hamba-hamba Allah yang menjunjung titah perintahNya. Kerana itu para 'ulama' sentiasa berusaha mencari hikmat di sebalik hukum-hakam yang ditentukan oleh Allah, kemudian mengemukakan penemuan-penemuan mereka kepada masyarakat umum. Banyak juga hikmat dan falsafah yang terdapat di sebalik penentuan sembahyang yang lima itu dalam waktu-waktu tertentu. Bagaimanapun penulis hanya ingin mengemukakan dua sahaja daripadanya di sini, kerana ia agak menarik. **Pertama:** Waktu-waktu sembahyang ditentukan Allah sedemikian rupa untuk menyatakan dua perkara utama. (1) Agar manusia mensyukuriNya. (2) Agar manusia sentiasa berwaspada dalam kehidupan mereka yang sementara ini. Sembahyang Subuh difardhukan selepas bangkit daripada masa tidur yang agak lama, masa tidur yang memang memuaskan manusia yang keletihan setelah sepanjang hari berjaga untuk melakukan pelbagai aktiviti hidup. Keadaan orang yang tidur di waktu malam yang gelap-gelita itu benar-benar

mengingatkan kita kepada kematian, di mana dia tidak sedar lagi tentang apa-apa yang berlaku di sekelilingnya. Suasana gelap-gelitanya mengingatkan kepada kegelapan di dalam kubur. Nyenyak tidurnya pula benar-benar membawanya ke alam kelenyapan. Tak ubah seperti orang yang telah mati! Orang yang telah mati tidak akan bangkit menanti matahari yang akan muncul di ufuk timur. Dia tidak akan bangkit melihat kembali sanak saudara dan sahabat handainya yang telah ditinggalkan. Bangkitnya hanya untuk menghadapi suatu alam yang lain, alam yang berbeza sama sekali daripada alam dunia yang telah ditinggalkannya. Alam Barzakh dan seterusnya alam Mahsyar dan seterusnya...! Apabila seseorang bangkit daripada tidur dan menghadapi semula kehidupan dunia seperti yang telah dihadapinya pada hari kelmarin, ia sepatutnya bersyukur kepada Allah kerana masih memberi peluang kepadanya untuk terus hidup di dunia ini. Dengan itu dapatlah dia memperbaiki mana-mana sikap dan tindakannya yang tersalah dan dapatlah juga ia bertaubat kepada Allah. Hakikat inilah yang digambarkan oleh Rasulullah s.a.w. melalui doa yang diajar beliau s.a.w. kepada umatnya supaya mereka membacanya bila bangkit daripada tidur. الْحَمْدُ لِلَّهِ الَّذِي أَحْيَانَا بَعْدَ مَا أَمَاتَنَا وَإِلَيْهِ النُّشُورُ. Bermaksud: "Segala puji (dan syukur) bagi Allah, Tuhan yang menghidupkan kita setelah dimatikanNya kita. KepadaNya jualah berlaku kebangkitan." Sembahyang Subuh yang dikerjakan selepas bangkit daripada tidur itu juga merupakan salah satu bentuk kesyukuran kepada Allah. Matahari yang muncul setiap hari setelah terbenam pada waktu petang semalamnya, sama seperti seorang yang tidur semalaman, kemudian bangun pada keesokan paginya. Maka 'aql manusia yang cetek mungkin berkata, sepatutnya sembahyang Subuh untuk menyatakan kesyukuran itu dikerjakan bersama-sama dengan naiknya matahari atau setelah matahari naik. Kenapa pula ia difardhukan sebelum matahari naik? Ahli-ahli hikmat menjawab, kerana dua sebab ia difardhukan sebelum matahari naik. (1) Supaya terhindar daripada waktu yang makruh dan terlarang. Bersembahyang pada waktu matahari sedang naik terlarang kerana menyerupai penyembah-penyembah matahari yang menyembahnya pada waktu itu atau kerana zahirnya menampilkan seolah-olahnya anda memuja matahari. (2) Untuk mengajar manusia agar mereka menampilkan penghargaan yang sungguh-sungguh dan sifat sangat mengambil berat tentang ni'mat yang dikurniakan. Daripada waktu naik matahari sehingga tergelincir matahari, tidak ada sembahyang difardhukan. Waktu itu ibarat zaman kanak-kanak dan zaman remaja bagi seseorang manusia yang kosong daripada sebarang taklif dan tanggungjawab. Setelah seseorang manusia itu lahir, - jika ditaqdirkan umurnya panjang - ia semestinya melalui zaman kanak-kanak dan zaman remaja yang penuh dengan kebodohan dan kosong daripada tanggungjawab itu. Hanya setelah matahari tergelincir, barulah ada sembahyang fardhu Zuhur. Ia mengisyaratkan kepada tamatnya zaman kanak-kanak dan zaman remaja yang berlalu tanpa apa-apa taklif dan tanggungjawab. Ia juga merupakan petanda yang menunjukkan umur manusia sudah mulai menurun dan semakin mendekati sasaran terakhirnya. Kerana itu ia mestilah mencari bekal dan bersiap sedia untuk menghadapinya. Maka difardhukanlah sembahyang fardhu berturut-turut bermula dengan Zuhur, 'Ashar, Maghrib dan kemudiannya 'Isyaa' sebagai peringatan kepada manusia supaya cepat-cepat memperbaiki diri, membuat persiapan dan mencari bekal secukupnya untuk menghadapi hari kemudian. Waktu 'Ashar menunjukkan seseorang manusia itu sudah betul-betul hampir dengan kematian dan ajalnya atau ia ibarat seorang tua yang hanya menunggu sa'at untuk meninggalkan dunia yang fana ini. Waktu Maghrib adalah waktu matahari terbenam. Kepada seorang manusia ia adalah waktu kematiannya. Kesan-kesan sinar matahari hanya kelihatan sementara hilangnya syafaq di ufuk barat. Akhirnya masuklah waktu 'Isyaa'. Waktu di mana tidak kelihatan lagi saki-baki sinar matahari. Yang akan ada hanyalah kegelapan demi kegelapan. Demikian juga dengan kehidupan manusia. Selepas kematiannya, ia akan disebut-sebut dan dikenang beberapa ketika oleh segelintir orang yang pernah mengenalinya. Kemudian teruslah dia bersendirian... Tiada lagi orang yang akan menyebut dan mengenangnya... Sembahyang fardhu Zuhur dan 'Ashar pada waktu masing-

masing merupakan penggera kepada manusia supaya bersegera memperbaiki diri, mencari bekal dan membuat persiapan. Sembahyang Maghrib dan 'Isyaa' pada waktu masing-masing pula merupakan peringatan kepada dua kesudahan dan akibat yang akan diterima setiap manusia yang hidup di dunia ini. **Kedua:** Hikmat dan rahsia di sebalik perintah Allah supaya manusia menunaikan sembahyang lima waktu sehari semalam pada waktu-waktu yang ditentukanNya ialah supaya nyata dengan senyata-nyatanya kepada manusia sifat Maha Pemurah, Maha Mengetahui, Maha Bijaksana dan Maha MengasihaniNya Allah s.w.t. itu. Menurut keterangan al-Qur'an, kejadian manusia itu pada asalnya hanya untuk beribadat kepada Allah semata-mata. Sebagai contohnya lihatlah tiga ayat berikut ini:

وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ ﴿٥٦﴾ مَا أُرِيدُ مِنْهُمْ مِنْ رِزْقٍ وَمَا أُرِيدُ أَنْ يُطِيعُونِ ﴿٥٧﴾ إِنَّ اللَّهَ هُوَ الرَّزَّاقُ ذُو الْقُوَّةِ الْمَتِينِ ﴿٥٨﴾

Bermaksud: Dan (ingatlah) Aku tidak menciptakan jin dan manusia melainkan untuk mereka beribadat kepadaKu. (56). Aku tidak menghendaki rezeki sedikitpun dari mereka dan Aku tidak menghendaki supaya mereka memberi makan kepadaKu. (57). Sesungguhnya Allah Dialah sahaja Yang memberi rezeki (kepada sekalian makhlukNya, dan Dialah sahaja) Yang mempunyai kekuasaan yang tidak terhingga, lagi Yang Maha kuat kukuh kekuasaanNya. (58). (Adz-Dzaariyaat:56-58). Memandangkan tujuan asal kejadian manusia itu ialah untuk beribadat kepada Allah semata-mata, sepatutnya ia beribadat kepadaNya pada setiap ketika daripada waktu malam dan siang. Kalau dilihat ni'mat Allah kepada manusia yang tak terhingga banyaknya, memang patut pun manusia itu sentiasa memuji dan memuja Allah pada setiap waktu. Ambil saja ni'mat-ni'mat besar yang dikurniakan kepada semua manusia, tidak kira sama ada mereka miskin atau kaya, besar atau kecil, daripada bangsa apa sekalipun. Nyawa dan kemampuan bernafas yang menyebabkan seseorang manusia itu hidup misalnya. Jika Allah menahan dan mengambilnya, niscaya ribuan doktor dan pakar perubatan di satu pihak yang lain tidak akan dapat melepaskan dan mengembalikannya. Menjadi seorang manusia sebagai contohnya, bukan atas pilihan kita. Hanya Allah jua yang menjadikan kita sebagai manusia, padahal Dia tentu boleh memilih untuk menjadikan kita sebagai anjing, kuda, lembu, katak, kutu, kuman, lipas atau biawak dan lain-lain. Banyak sekali sebab untuk manusia itu bersyukur kepada Allah jika dilihat kepada kurniaan-kurniaanNya yang tidak terhingga itu. Lalu sebagai manifestasi daripada rasa syukur kepadaNya, manusia memang sewajarnya mengabdikan diri dan beribadat kepadaNya sepanjang masa. Tetapi Allah Maha Mengetahui tentang kelemahan manusia dan keperluan mereka dalam kehidupan dunia ini. Maka dibahagiNyalah waktu siang dan malam itu kepada dua bahagian. Satu bahagian daripadanya untuk manusia memenuhi keperluan hidupnya. Satu bahagian lagi untuk mereka beribadat kepadaNya. Kalau dibahagi dua, kiranya sudah bolehlah waktu siang itu dibahagi untuk manusia memenuhi keperluannya dan waktu malam pula dikhususkan untuk mereka beribadat. Tetapi sebahagian keperluan manusia itu berkait dengan waktu siang dan sebahagian yang lain pula berkait dengan waktu malam. Dalam keadaan ini tidak wajar kalau waktu siang sahaja diperuntukkan kepada manusia buat memenuhi keperluannya. Kerana itu Allah membahagikan waktu siang kepada dua bahagian dan waktu malam juga kepada dua bahagian. Satu bahagian daripada waktu siang dan malam diberikan kepada hamba untuk memenuhi keperluan hidupnya dan satu bahagian daripada dua waktu itu pula untuk hamba beribadat kepadaNya. Sekali lagi terserlah sifat murah dan belas kasihan Allah s.w.t. kepada hamba-hambaNya. Bukankah anda melihat bermula daripada selepas sembahyang Subuh tidak ada sembahyang difardhukan hinggalah masuk waktu Zuhur? Itulah bahagian waktu siang yang Allah berikan kepada hamba untuk memenuhi keperluannya. Bukankah anda juga melihat daripada selepas sembahyang 'Isyaa' hingga masuk waktu Subuh tidak ada sembahyang difardhukan? Nah, itulah bahagian waktu malam yang Allah berikan kepada hamba-hambaNya untuk memenuhi keperluan mereka! Bahagian siang dan malam untuk beribadat kepada Allah tidaklah mengambil betul-betul separuh waktu daripadanya. Lihatlah bahagian kedua waktu siang. Waktu bersembahyang padanya